

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

RJEŠENJE

Prijava koncentracije privrednog subjekta Junuzović-kopex d.o.o. Lukavac

Sarajevo
juli, 2014. godine



Broj: 02-26-1-10 - 7 -II/14
Sarajevo, 17.7.2014. godine

Na osnovu člana 25. stav (1) tačka e), člana 42. stav (1) tačka d), a u vezi sa članovima 12., 14., 16. i 18. Zakona o konkurenciji („Službeni glasnik BiH“, br. 48/05, 76/07 i 80/09), a rješavajući po Prijavi koncentracije privrednog subjekta Junuzović-kopex d.o.o. za niskogradnju, proizvodnju, promet roba i usluga, uvoz-izvoz, Modrac-Studenac bb, 75 300 Lukavac, zaprimljenoj dana 12.5.2014. godine pod brojem: 02-26-1-10-II/13, Konkurencijsko vijeće Bosne i Hercegovine, na 94. (devedesetčetvrtoj) sjednici održanoj dana 17.07.2014. godine, donijelo je

R J E Š E N J E

1. Ocjenjuje se dopuštenom koncentracija na tržištu gradskog i prigradskog prevoza putnika na području Tuzlanskog kantona koja će nastati sticanjem kontrole privrednog subjekta Junuzović-kopex d.o.o. za niskogradnju, proizvodnju, promet roba i usluga, uvoz-izvoz, Modrac-Studenac bb, 75 300 Lukavac, nad privrednim subjektom Dioničko društvo Gradski i prigradski saobraćaj Tuzla, Bukinje bb, 75 000 Tuzla, kupovinom (..)**1% vlasničkih udjela u osnovnom kapitalu.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

Obrazloženje

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 12.5.2014. godine pod brojem: 02-26-1-10-II/14, od privrednog subjekta Junuzović-kopex d.o.o. za niskogradnju, proizvodnju, promet roba i usluga, uvoz-izvoz, Modrac-Studenac bb, 75 300 Lukavac (dalje u tekstu: Podnosilac prijave ili Junuzović-kopex) zaprimilo Prijavu koncentracije (u daljem tekstu: Prijava), kojom privredni subjekt Junuzović-kopex ima namjeru steći većinski udio u osnovnom kapitalu privrednog subjekta Dioničko društvo Gradski i prigradski saobraćaj Tuzla, Bukinje bb, 75 000 Tuzla (u daljem tekstu: Gips Tuzla).

Podnosilac prijave je predmetnu prijavu dopunio podneskom broj: 02-26-1-10-2-II/14 dana 2.6.2014. godine.

Po prijemu dokumentacije Konkurencijsko vijeće je utvrdilo Prijavu kompletnom i izdalo Potvrdu o prijemu kompletne i uredne Prijave, u skladu sa članom 30. stav (3) Zakona o konkurenciji (u daljem tekstu: Zakon), dana 17.7.2014. godine, aktom broj: 02-26-1-10-5-II/14.

Podnosilac prijave, u skladu s članom 30. stav (2) Zakona, je naveo da Prijavu nije podnio niti ima namjeru podnijeti ovlaštenim tijelima za ocjenu koncentracije izvan teritorije Bosne i Hercegovine.

¹ (..)** Podaci predstavljaju poslovnu tajnu, u smislu člana 38. Zakona o konkurenciji

Konkurencijsko vijeće je, u skladu s članom 16. stav (4) Zakona, izdalo Obavještenje o dostavljenoj Prijavi broj: 02-26-1-10-3-II/14 od dana 2.7.2014. godine, koje je u dnevnoj štampi objavljeno dana 4.7.2014. godine, i pozvalo sve zainteresovane strane na dostavljanje pisanih komentara o namjeravanoj koncentraciji. Na predmetno Obavještenje nisu dostavljeni komentari zainteresovanih strana.

Konkurencijsko vijeće u postupku ocjene dopuštenosti predmetne koncentracije je utvrdilo slijedeće činjenice:

Prijava je podnesena u smislu člana 16. stav (2) Zakona (pravni osnov: Pismo namjere).

1. Učesnici koncentracije

Učesnici koncentracije su privredni subjekt Junuzović-kopex d.o.o. za niskogradnju, proizvodnju, promet roba i usluga, uvoz-izvoz, Modrac-Studenac bb, 75 300 Lukavac, privredni subjekt Samn d.o.o. za proizvodnju, promet i usluge Tuzla, Nikole Tesle bb, 75 000 Tuzla i Dioničko društvo Gradski i prigradski saobraćaj Tuzla, Bukinje bb, 75 000 Tuzla, Bosna i Hercegovina.

1.1. Privredni subjekt Junuzović-kopex

Privredni subjekt Junuzović-kopex d.o.o. za niskogradnju, proizvodnju, promet roba i usluga, uvoz-izvoz, Modrac-Studenac bb, 75 300 Lukavac, upisan je u Registar Općinskog suda u Tuzli pod brojem: 1-7573 (ID: 4209157220005) sa uplaćenim osnovnim kapitalom u iznosu od (..)**KM, i sa (..)**% vlasničkih udjela fizičkog lica Junuzović Amira ((..)**, 75 000 Tuzla).

Osnovna djelatnost privrednog subjekta Junuzović-kopex je promet naftnim derivatima na području Federacije Bosne i Hercegovine.

Prema podacima iz Prijave privredni subjekt Junuzović-kopex nema povezanih društava u Bosni i Hercegovini.

1.2. Privredni subjekt Samn d.o.o. za proizvodnju, promet i usluge Tuzla

Privredni subjekt Samn d.o.o. za proizvodnju, promet i usluge Tuzla, Nikole Tesle bb, 75 000 Tuzla (u daljem tekstu: Samn d.o.o. Tuzla) upisan je u Registar Općinskog suda u Tuzli pod brojem 1-14103 (ID broj: 4209842100004), sa uplaćenim osnovnim kapitalom u iznosu od (..)**KM, i sa (..)**% vlasničkih udjela fizičkog lica Nijaza Suljkića ((..)**, 75 000 Tuzla).

Osnovne registrovane djelatnosti privrednog subjekta Samn d.o.o. Tuzla su tehničko ispitivanje i analiza (vozila).

1.3. Privredni subjekt Gips Tuzla – predmet koncentracije

Privredni subjekt Dioničko društvo Gradski i prigradski saobraćaj Tuzla, Bukinje bb, 75 000 Tuzla, Bosna i Hercegovina, upisan je u Registar Općinskog suda u Tuzli pod brojem 1-250 (ID broj: 4209197100002), sa osnovnim kapitalom od (..)**KM, sa (..)**% vlasničkih udjela privrednog subjekta Samn d.o.o. Tuzla i (..)**% vlasničkih udjela fizičkog lica Nijaza Suljkića dok je preostalih (..)**% u vlasništvu svih ostalih dioničara.

Osnovna djelatnost privrednog subjekta Gips Tuzla je gradski i prigradski prevoz putnika na području Tuzlanskog kantona.

1.3.1. Povezana društva privrednog subjekta Gips Tuzla (predmet koncentracije)

Privredni subjekt Gips Tuzla ima (..)**% vlasničkih udjela u privrednom subjektu:

- T&A Remag d.o.o. Tuzla, Bukinje bb, 75 000 Tuzla upisan u Općinskom sudu u Tuzli pod brojem: 32-01-0343-10 (ID broj: 4210003960004), osnovna djelatnost - održavanje i popravak motornih vozila;
- Tadi Benc d.o.o. Tuzla, Bukinje bb, 75 000 Tuzla upisan u Općinskom sudu u Tuzli pod brojem: 32-01-0061-12 (ID broj: 4210060250005), osnovna registrovana djelatnost - trgovina dijelovima i priborom za motorna vozila na veliko;
- Aut Luk d.o.o. Lukavac, Kula bb, 75 300 Lukavac upisan u Općinskom sudu u Tuzli pod brojem: 32-01-0326-10 (ID broj: 4209999180001), osnovna registrovana djelatnost - prevoz putnika u gradskom saobraćaju.

Prema podacima iz Prijave, navedena povezana društva privrednog subjekta Gips Tuzla su također predmet koncentracije.

2. Pravni osnov i pravni oblik koncentracije

Kao pravni osnov ove koncentracije Podnosilac prijave je dostavio „Pismo namjere“ potpisano u Lukavcu, dana 5.5.2014. godine odnosno dana 9.5.2014. godine, od privrednog subjekta Junuzović-kopex (kupac) i privrednog subjekta Samn d.o.o. Tuzla i fizičkog lica Nijaza Suljkića, kojim se izražava namjera sticanja kontrole nad osnovnim kapitalom privrednog subjekta Gips Tuzla.

Pismom namjere definisano je da će privredni subjekt Junuzović-kopex steći ukupno (..)**% udjela u osnovnom kapitalu privrednog subjekta Gips Tuzla, i to od :

- fizičkog lica Nijaza Suljkića koje će prenijeti na privredni subjekt Junuzović-kopex (..)**% udjela u osnovnom kapitalu ili (..)**dionica;
- privrednog subjekta Samn d.o.o. Tuzla koji će prenijeti na privredni subjekt Junuzović-kopex (..)**% udjela u osnovnom kapitalu ili (..)**dionica.

U skladu sa naprijed navedenim, a na osnovu člana 12. stav (1) tačka b) pod 1. Zakona, pravni oblik koncentracije je sticanje kontrole jednog privrednog subjekta nad drugim u skladu sa odredbama Zakona.

3. Pravni okvir ocjene koncentracije

Konkurencijsko vijeće je u postupku ocjene koncentracije primijenilo odredbe Zakona, Odluke o utvrđivanju relevantnog tržišta («Službeni glasnik BiH», br. 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekata.

Konkurencijsko vijeće je, na osnovu člana 43. stav (7) Zakona, koristilo sudsku praksu Evropskog suda i odluke Evropske komisije, kao i kriterije i standarde iz Obavijesti Evropske Komisije o izračunu ukupnog prihoda u skladu s Uredbom Vijeća (EEZ) broj: 4064/89 o kontroli koncentracije privrednih subjekata.

4. Obaveza prijave koncentracije

Obaveza prijave koncentracije privrednih subjekata, u smislu člana 14. stav (1) tačke a) i b) Zakona, postoji ako ukupni godišnji prihodi učesnika koncentracije ostvareni prodajom roba

i/ili usluga na svjetskom tržištu iznose 100.000.000,00 KM, po završnom računu u godini koja je prethodila predmetnoj koncentraciji, i da ukupan prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM, ili ako je zajednički tržišni udio učesnika koncentracije na relevantnom tržištu veći od 40,0%.

Ukupni ostvareni godišnji prihodi privrednih subjekata učesnika predmetne koncentracije na dan 31.12.2013. godine iznosili su:

Tabela 1.

Ukupni prihod (KM)	Junuzović-kopex	Samn d.o.o. Tuzla	Gips Tuzla
Bosna i Hercegovina	(..)**	(..)**	(..)** *
Svijet	-	-	-

Izvor: podaci iz Prijave; *- ukupni godišnji prihod uključujući prihode povezanih društava: T&A Remag d.o.o Tuzla – (..)**KM; Tadi Benc d.o.o. Tuzla – (..)**KM i Aut Luk d.o.o. Lukavac – (..)**KM.

Godišnji prihod privrednog subjekta Junuzović-kopex u 2013. godini iznosio je ukupno (..)**KM koji je uključivao i prihod ostvaren međusobnom razmjenom sa privrednim subjektom Gips Tuzla u iznosu od (..)**KM. Godišnji prihod privrednog subjekta Gips Tuzla koji je uključivao i prihode njegovih povezanih društava iznosio je (..)**KM, dok je prihod privrednog subjekta Samn d.o.o. Tuzla za 2013. godinu iznosio (..)**KM.

Godišnji prihodi učesnika koncentracije (Tabela 1.) predstavljaju ukupne prihode (bez poreza na dodatnu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekata.

Prema podacima navedenim u Prijavi (Tabela 1.), privredni subjekti, učesnici koncentracije, ispunjavaju uslov obaveze prijave koncentracije u pogledu ostvarenog zajedničkog ukupnog godišnjeg prihoda u smislu člana 14. stav (1) Zakona, te su bili obavezni prijaviti koncentraciju.

5. Relevantno tržište koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu, relevantno tržište obuhvata sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cjelokupnu ili dio teritorije Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Uzimajući u obzir pretežne registrovane djelatnosti učesnika koncentracije, relevantno tržište proizvoda i/ili usluga u konkretnom slučaju je tržište gradskog i prigradskog prevoza putnika.

Uzimajući u obzir područje djelovanja privrednog subjekta Gips Tuzla kao geografsko područje koncentracije utvrđeno je područje Tuzlanskog kantona.

Slijedom navedenog, pod relevantnim tržištem predmetne koncentracije smatrat će se tržište gradskog i prigradskog prevoza putnika na području Tuzlanskog kantona.

5.1. Analiza tržišta koncentracije

Podnosilac prijave dostavio je procjenu tržišnog udjela (Tabela 2.) temeljenu na posljednjem usaglašavanju redova vožnje kantonalnih linija Tuzlanskog kantona. Prijavljeno je ukupno 26 prevoznika sa svojim redovima vožnje od kojih je 19 imalo redove vožnje koji su bili registrovani do Međugradske autobuske stanice Tuzla, autobuske stanice Zapad i autobuske stanice Istok.

Navedenih 19 prevoznika obavlja ukupno (..)** polazaka iz općine Tuzla i (..)** dolazaka u općinu Tuzla na tri pomenute stanice.

Tabela 2.

R.b.	Naziv prevoznika	Ukupno dolazaka/odlazaka	Ukupno %
1.	Gips Tuzla	(..)**	(..)**
2.	Litvatrans d.d. Banovići	(..)**	(..)**
3.	Road d.o.o. Lukavac	(..)**	(..)**
4.	Bjeljevac tours d.o.o. Kalesija	(..)**	(..)**
5.	Ostali	(..)**	(..)**
	Ukupno	664	100,00

Izvor: Podaci iz Prijave;

Na osnovu analize podataka, utvrđeno je da privredni subjekt Gips Tuzla na tržištu gradskog i prigradskog prijevoza putnika na području Tuzlanskog kantona ima udio od (..)**% (Tabela 2.) dok privredni subjekt Junuzović-kopex ne djeluje na navedenom tržištu.

6. Ocjena koncentracije

Konkurencijsko vijeće je, nakon procjene i analize podataka i utvrđenih činjenica u postupku donošenja predmetnog Rješenja ocijenilo da provedba predmetne koncentracije ne vodi horizontalnom preklapanju učesnika koncentracije s obzirom da privredni subjekt Junuzović-kopex ne djeluje na tržištu gradskog i prigradskog prevoza putnika na području Tuzlanskog kantona, te da će tržišni udjeli privrednog subjekta Gips Tuzla ostati nepromijenjeni, odnosno neće proizvesti promjenu tržišnih pozicija na relevantnom tržištu.

Konkurencijsko vijeće je utvrdilo također da predmetna koncentracija ne sprječava, ograničava niti narušava tržišnu konkurenciju na relevantnom tržištu gradskog i prigradskog prevoza putnika Tuzlanskog kantona te je odlučilo kao u dispozitivu ovog Rješenja.

7. Administrativna taksa

Podnosilac Prijave na ovo Rješenje, u skladu sa članom 2. Tarifni broj 107. tačka d) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) je dužan platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

8. Pouka o pravnom lijeku

Protiv ovog Rješenja nije dozvoljena žalba.

Nezadovoljna strana može pokrenuti upravni spor pred sudom Bosne i Hercegovine u roku od 30 dana od dana prijema, odnosno objave ovog Rješenja.

Predsjednik

Gordan Raspudić